

COMUNICATO n. 889 del 22/04/2024

Traduzione in ladino

Servije zivil, l é a la leta 75 projec neves per 124 joegn

[Ladino] L é averta la seconda sescion, sun cater che vegnarà metù a jir fora per chest an, per poder cerner anter la proponetes del Servije zivil universèl provinzièl. Pel se ensciner, e vegnir cernui fora per un di 75 projec orì, joegn anter i 18 e i 29 egn no amò fac, per 124 pos a la leta. L termin l é stabilii a na vida autonoma da ogni projet, aboncont dant che sie fora i 3 de mé, enveze duc i projec i scomenzarà en sabeda 1m de jugn.

Per la vizepresidenta de la Provinzia e assessora a l'istruzion, cultura e sport, politiches per la familia, per i joegn e per la medema oportunitèdes anter om e femena, tor pèrt al Servije zivil vel dir se dèr ju te n contest operatif concret, tor su competenzes da poder durèr tel mond del lurier, doventèr gregn e sentadins responsaboi. La vizepresidenta la envia duc i joegn a jir su la piata internet del projet per troèr fora, anter la tropa proponetes, chela che più confèsc a sie esser e a sia capacitèdes: l sevije zivil provinzièl l é per i joegn na oportunità per se fèr ite tel mond del lurier tras contes e projec zertifiché dai ofizies provinzièli de competenza e donca con n profil muie ascort per chel che revèrda la reèles e concretes possibilitèdes sportes da la desferenta organizacions. Unfat, Scup ge dèsc l met ai joegn de cognoscer ence neves setores de enteres e de cognoscer cheche più ge confèsc e ge pièsc. Per chesta rejons la vizepresidenta la engaisa i joegn a tor pèrt a chest projet.

La sentes olache vegnarà endrezé i projec les é sun dut l raion de la Provinzia. La maor pèrt a Trent (39) e te Vallagarina (21), ma l é pos ence a Ala, Borgo, Cles, Perjen, te la Piana Rotaliana, te la Valle dei Laghi e te autres lesc del raion provinzièl. L é 67 projec per doudesc meisc alalongia; 5 projec per sie meisc e 3 projec per trei meisc.

Desferenc i setores olache se pel lurèr: ambient, animazion, didament, comunicazion e technologies, cultura, educazion e formazion, sport e turism. Per ogni projet l é sul sit n formulèr coi contac, l document entrie ch del projet e l document de sintesa, olache l é na sumèda de la informacions de utol de la perferida. Vegn conseà de tor contat co la organizacions che porta dant l projet, che les met a la leta na persona per dèr duta la informacions e schiarimenc. L'orarie de lurier l é en media de 30 ores en setemèna, aldò de en paament de 600 euro al meis. Se pel se ensciner demò a un projet.

L Ofize Servije zivil de la Provinzia l é a la leta per scontrèdes de informazion per chi che à enteres. Ogni scontrèda la dèsc l met de tor su informacions per poder cerner l projet e per portèr dant l ejam a ousc per la valutazion de la competenzes. Se rejonarà de che che l é l Servije zivil, coche l é fat n projet, coche ge vel l lejer, coche se l cern, che che ge vegn domanà a chiche vel tor pèrt e trop auter. Duta la scontrèdes les vegnarà fates online: per tor i codesc de azes ge vel jir sul sit SCUP.

I dis e i oraries de la scontrèdes l é chisc:

En lunesc ai 15 de oril, da la 14:00

En jebia ai 18 de oril, da les 21:00

En mèrtesc ai 23 de oril, da les 11:00

Per più informaziuns en cont al Servije zivil, ai requisic che ocor per poder tor pèrt e per didament per se enscinuèr, se pel se oujer al Ofize Servije zivil de le Provinzia te via Grazioli, 1, a Trent; Mail:

uff.serviziocivile@provincia.tn.it;

Tel: 0461 493 100.

Informaziuns en cont al servije zivil: www.serviziocivile.provincia.tn.it/

Per entener co se enscinuèr a SCUP: <https://serviziocivile.provincia.tn.it/Adesione%23iscriviti>

Per veder duc i projec a la leta:

[https://serviziocivile.provincia.tn.it/Progetti/\(filter\)/Progetti%2520SCUP_PAT](https://serviziocivile.provincia.tn.it/Progetti/(filter)/Progetti%2520SCUP_PAT)

L é de utol ence jir a veder la piata Facebook “WeSCUP il servizio civile trentino” e Instagram #SCUP Trento.

Traduzion di Servijes Linguistics e Culturèi del Comun general de Fascia

(cdt)